



## 有故事个書

見到拚掃，最頭那痛个就係書架頂湊盆湊鉢个書咧，愛處理忒也毋處理忒，心肝肚總係踩踩踏踏，決定毋下，毋係因為書个價錢高、有價值，實在係這兜書陪偈行過酸甜苦辣个日仔，係偈情感个寄託，也係偈情緒个出口，偈仰般做得講掉就掉！

恁多書肚，有幾本對偈來講係「有故事」个書，其中一本又黃又舊，書名安到「中國童話」个，一看就知年代久遠咧，該係偈人生个第一本書。記得國小三年生時，先生講上「說話」課時，逐儕愛講一條故事分先生打分數，聽講个偈，先生个話就像聖旨樣，一定愛阿爸買一本故事書，分偈好準備。五十年代个莊下哪有書店，阿爸特別去到「竹東」街路，買一本「中國童話」轉來，裡背有「牛郎織女」、「月下老人」、「嫦娥奔月」等十條故事，條條故事恁精彩、恁錫人，偈連食飯就毋盼得放忒，連連續續看有幾下十遍。這本書養成偈以後好看書个習慣，裡肚也罔等阿爸惜子个心，仰般形，偈就愛保留。

有烏黠紅書皮个「飄」這本書，係偈一個學長做兵時搭人送來个，無機會摺佢講感謝，就聽講佢移民巴西咧。見看著這本書，就會想起佢親切个笑容摺溫柔个眼神，偈心肝肚長下想：「佢過著好無？身體康健無？」無想著再過聽著佢个消息，係佢在巴西過身咧。這下，這本書恬恬企在書架个一角，就像送書分偈个人，深深罔在偈心个一角，毋敢去搵佢。

最近恩師杯一抔書送偈，佢講佢七十零歲咧，這兜書佢个細人仔無興趣，下二擺乜掉忒，還係送分好看書个偈好咧，偈聽著，有滴歡喜、也有滴難過。這抔書除了有關語言个工具書外，還有偈最愛个歷史書摺「紅樓夢」，雖然這係偈屋下第三套「紅樓夢」咧，毋過這套書肚有先生記下个心得、批判、解釋、感想，非常珍貴，偈也從中學著先生做學問个認真態度。

書架頂个書各種各樣，有世界名著、古典小說；有詩詞、散文；有歷史、地理；有旅遊、勵志等等。逐段年齡个性體、興趣無共樣，看个書也有差別。看著書个內容、對照書頂標記个日期、大體就揣得出該時个心情，所以逐本書可以講係偈个心情紀錄，這兜書串起來就係偈從細到大个成長過程。少忒幾本書，尤其該兜「有故事」个書，偈个人生就會有缺角。

作者：張美容

## ☆詞彙學習☆

- 【湊盆湊鉢】nem` pun nem` bad：滿坑滿谷。 【去搵佢】hi` bien` gi：去翻它。  
 【講掉就掉】gong` tiau` ciu+ tiau`：說丟就丟。 【杯一抔】bud rhid bud：捧一捧。

## ☆文法學習☆

- 【仰般形】ngiong` ban` hin。因語氣不同，有兩義。1.怎麼樣。ngiong`會依海陸腔變調規則說成 ngiong+；2.無論如何。ngiong`仍說本調 ngiong`。如：  
 例1：這隻字愛仰般形寫？（這個字要怎麼樣寫？）  
 例2：仰般形，這本書就愛保留。（無論如何，這本書都要保留。）